



Tusagassiutitigut nalunaarut

Maniitsoq, 9. september 2010

Kommunit nakkaattoorluinnalerput!

Ulluni kingullerni tusagassiutitigut nalunaarutigineqarpoq Qaasuitsup kommunia ukiup sinnerani 15 – 20 mio kr.-nik sipaaruteqartariaqartoq ajutuunnginnissaq anguniarlugu.

Naalakkersuisut Inatsisartunilu amerlanerussuteqartut politikkikkut aqut atuassallugu aalajangiussimasaat allanngortinneqanngippat piffissami ungasinngitsumi kommunit tamarmik ajutoorluinnarnissaat qularnanngilaq.

Kommunit ajutoorluinnalernerinut annerpaamik patsisaasut ilagivaat sanaartugassanut aningaasaliissutit tamarluinnangajammik Nuummut inissinneqarsimaneri. Aningaasanut inatsimmi ukioq mannamut atuuttumi takuneqarsinnaavoq sanaartugassanut aningaasaliissutit tamarluinnangajammik Nuummut inissinneqarsimasut. Aappaagumut ukiunullu tulliuuttunut aningaasanut inatsisissatut siunnersuummi takuneqarsinnaavortaaq aningaasat sanaartugassanut atugassat tamarluinnangajammik ajoraluartumik aamma Nuummut inissinniarneqartut.

Taamatut ingerlatsinerup soorunami kingunerissavaa sinerissami illoqarfinni tamarluinnarni, Nuuk kisiat minillugu, suliffissaaleqisut amerliartupiloorneri.

Kommunit aningaasatigut ajutoorluinnalernerinut aamma patsisaaqataannngitsuunngilaq kommunerujussuanngornerup malitsigisaanik aningaasartuuteqarnerulernerit assigiinngitsut, soorlu innuttaasut atugaasa assigiissarnerinut aningaasartuuterpassuit, kommuninngortunik taamaallaat nammaneqarneri.

Kommunit aqqissuusseqqinnerup ilaatigut siunertarigaluarpa Namminersorlutik Oqartussat kommunillu nammaqatigiillutik aningaasartuutaalertussanik avitseqatigiinnissaat. Ajoraluartumilli tamanna ullumikkut uniorluinnarneqarpoq kommuninut artukkiiartuinnartumik.

Qulaani taasat qaavatigut ilallugu Inatsisartuni amerlanerussuteqartut 2010-mut aningaasanut inatsimmi aalajangiinerisigut kommunit 30 mio. kr.-nik sipaarniarfigineqarnikuupput, paasinarlunilu aningaasanut inatsisissatut siunnersuummi saqqummiunneqartumi sulii aamma siunissami sipaarniarfigineqarnissaat siunniuffigineqartoq, taassuma saniatigut 40 mio. Kr. angullugit annikinnerusumik 2011-imi tunniunneqartussaapput siorna pisarialinnut suliaassanut atuiuserisimaneq peqqutigalugu kommuni, ilanngullugu kommunit akileraarutitigut isertitassat mangiarneqalersussaallutik, aningaasanut inatsisissamat siunnesuummi ima allassimasoqarpoq: *“sulisorisat avataaneersut illoqarfiit nunaqarfiillu avataanni sanaartugassanik suliaqartussat aatsitassarsiornerup imaluunniit sermimik imermillu avammut nioqquteqarnermi sulisorineqartut ilanngaasigaanngitsunik akileraartinneqartalernissaannik aqqissuussisoqassasoq siunnersuutigineqarpoq. Kiisalu inuit akissarsiaminnit 35%-imik akileraartinneqartarnissaat siunnersuutigineqarpoq”*, taassumalu eqqunniarneqarnera sumi inunngorsimaneq aallaavigalugu akissaasersuinermut assingusumik eqqussiarortoqalersoq Nunasiaatip Grønland-ip nalaanni ingerlaaserineqartoq Siumumi isumaqarpugut.

Taamaammat tupaallannanngilluinnarpoq tupinnartutullu oqaatigineqarsinnaanani kommunit ullutsinni ajornartorsiulersimanagerat, ajornartorsiuleraluttuinnarnerallu.



SIUMUT INATSISARTUNI ILAASORTAATITAT / LANDSTINGSGRUPPEN

Ajornerpaarlu unaavoq: Kommunit ajornartorsiulernerisa kingunerisaanik eqqornerlunneqartussat tassaammata INNUTTAASUT TAMARMIK!

Meeraarannguaniiit utoqqarsuarnut kiffartuussinerit tamarmik qularnaatsumik ajorseriartussaapput, kommunimmi tassaammata innuttaasunut kiffartuussisussatut pisussaasut, taamaammat kommunit akissaaruppata allat eqqornerqarsinnaanngillat innuttaasut tamatta.

Kommunit ajornartorsiorderat qaangerneqassappat, imaluunniit ajutuinnissaat pinngitsoortinneqassappat, naalakkersuinikkut ingerlatsineq allanngortilluinnartariaqarpoq. Allatut pisoqanngippat kommunit tamarmik nakkaattoorluinnassapput, kommunillu nakkaattoorderat inuiaqatigiinnut tamanut tuniluulluni innuttaasut atugaat ajorseriarujussuarlutik.

Karl Lyberth

Politikikkut oqaaseqartartoq, SIUMUT